

Na osnovu člana 15. stav 1. tačka 2. Zakona o principima lokalne samouprave u Federaciji Bosne i Hercegovine („Službene novine Federacije BiH“ br.49/06 i 51/09), čl. 71 Statuta Općine Vogošća – („Službene novine Kantona Sarajevo“, broj 27/14 – Prečišćeni tekst i 14/15, 9/20 i 23/24), člana 13. Odluke o izvršavanju Budžeta Općine Vogošća za 2026. godinu („Službene novine Kantona Sarajevo“, broj 2/26) Odluke o načinu primjene smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine, broj: 02-02-575/25 od 15.04.2025. godine, Općinski načelnik objavljuje:

PRAVILNIK

O SUFINANSIRANJU ODLASKA MLADIH SPORTISTA SA PODRUČJA OPĆINE VOGOŠĆA NA INTERNACIONALNA TAKMIČENJA

I. OPĆE ODREDBE

Član 1. (Predmet Pravilnika)

Ovim Pravilnikom utvrđuje se kriterij, način i postupak raspodjele budžetskih sredstava Općine Vogošća (u daljem tekstu: Općine) iz granta za sufinansiranje odlaska mladih sportista sa područja općine Vogošća na internacionalna takmičenja.

Član 2. (Definicija i cilj)

- (1) Sportista predstavlja lice koje se priprema i učestvuje u organizovanim sportskim takmičenjima.
- (2) Novčana podrška za aktivno učešće u takmičarskim procesima ima za cilj razvoj sportiste, omogućavanje učešća u važnim sportskim događajima, a u cilju ličnog razvoja kao i ostvarivanja javnog interesa kroz jačanje pojedinaca u sportu.

Član 3. (Rodno značenje izraza)

Izrazi koji se koriste u ovom Pravilniku, ako imaju rodno značenje, bez obzira jesu li korišteni u muškom ili ženskom rodu, obuhvataju na jednak način muški i ženski rod.

II. PRAVA I NAČIN DODJELE SREDSTAVA

Član 4. (Pravo na dodjelu)

Pravo na dodjelu sredstava iz ovog granta mogu ostvariti sportisti uz ispunjavanje sljedećih uslova:

- a) Da je državljanin Bosne i Hercegovine;
- b) Da ima prebivalište na području općine Vogošća u trajanju od minimalno godinu dana do dana podnošenja zahtjeva;
- c) Starosne dobi od 15 do 25 godina;
- d) Aktivno učestvuju u trenažnim i takmičarskim procesima.

Član 5.
(Postupak dodjele)

- 1) Sredstva za sufinansiranje odlaska na internacionalna takmičenja dodjeljuju se putem Javnog poziva i podnesenih zahtjeva po istom.
- 2) Zahtjeve iz stava (1) ovog člana podnose se na propisanom obrascu, a koji je sastavni dio Javnog poziva.
- 3) Javni poziv se objavljuje na web stranici Općine, i ostaje otvoren do kraja tekuće godine, odnosno do utroška planiranih sredstava za ovu namjenu.
- 4) Zahtjevi se dostavljaju službi nadležnoj za sport (u daljem tekstu: Služba) putem protokola Općine i putem pošte, najkasnije 10 (deset) dana prije odlaska na takmičenje.
- 5) Služba će u roku od 7 (sedam) dana od dana prijema zahtjeva utvrditi da li su ispunjeni kriteriji za dodjelu sredstava, te obavijestiti podnosioca zahtjeva.
- 6) Na obavijest iz stava (5) ovog člana kandidati se mogu u roku od 8 (osam) dana od dana prijema iste, podnijeti pismeni prigovor Komisiji.
- 7) Komisiju iz stava (6) ovog člana imenuje Općinski načelnik iz reda državnih službenika.
- 8) Odluku o prigovoru, Komisija će donijeti u istom roku, računajući od dana njegovog podnošenja.

Član 6.
(Potrebna dokumentacija)

- 1) Uz zahtjev je potrebno priložiti sljedeće dokumente:
 - a) Uvjerenje o kretanju za sportistu;
 - b) Potvrda kluba da je sportista aktivan član;
 - c) Dokaz o učešću na takmičenju izdat od strane organizatora takmičenja, matičnog kluba ili sportskog saveza – potvrda ili uvjerenje
 - d) Dokaz da troškove odlaska na sportsko takmičenje u cjelosti ne snosi organizator takmičenja, matični klub, sportski savez, drugi nivoi vlasti ili sportski sponzori – potvrda, uvjerenje ili izjava podnosioca zahtjeva;
 - e) Pregled troškova odlaska na takmičenje potpisan od strane podnosioca zahtjeva;
 - f) Potvrda o otvorenom računu u banci.

Član 7.
(Iznos sredstava)

- (1) U skladu sa ovim Pravilnikom sredstva će se dodjeljivati za sufinansiranje troškova prevoza, smještaja sportista, plaćanje troškova kotizacije za takmičenje, plaćanje troškova vize i/ili za troškove ishrane sportiste u vrijeme trajanja takmičenja.
- (2) Sredstva iz stava (1) ovog člana dodjeljivat će se jednom u toku kalendarske godine, na sljedeći način:
 - a) U neto iznosu 200,00 KM za odlazak na takmičenja u zemlje regiona (Crna Gora, Srbija, Kosovo, Albanija, Sjeverna Makedonija, Hrvatska i Slovenija);
 - b) U neto iznosu 400,00 KM na odlazak takmičenja u ostale zemlje Europe;
 - c) U neto iznosu 700,00 KM na odlazak takmičenja u druge zemlje, a koje nisu definisane stavovima a) i b) ovog člana.

- (3) Ukoliko je iznos aktivnosti manji od iznosa navedenih u stavu (2) ovog člana, Općina će financirati stvarne troškove aktivnosti.

III. MONITORING I IZVJEŠTAVANJE

Član 8. (Izvještavanje i monitoring)

- (1) Korisnici sredstava obavezni su dostaviti Službi finansijski i narativni izvještaj sa dokumentacijom o namjenskom utrošku sredstava u roku od trideset (30) dana nakon realizacije sredstava ili povratka sa takmičenja, a najkasnije do kraja tekuće godine za koju su dodjeljena sredstva.
- (2) Korisnik sredstava koji ne dostavi izvještaj u skladu sa stavom (1) ovog člana u obavezi je izvršiti povrat nenamjenskih utrošenih ili neiskorištenim sredstava Općini, u roku od sedam (7) dana od dana zaprimanja zahtjeva Općine za povrat istih.
- (3) Služba zadržava pravo da vrši monitoring pregleda troškova u toku postupka za ostvarivanje prava.
- (4) Korisnik sredstava se obavezuje da tokom takmičarkog procesa promoviše i ističe podršku lokalne zajednice.

IV. PRELAZNE I ZAVRŠNE ODREDBE

Član 9. (Stupanje na snagu)

Ovaj Pravilnik stupa na snagu narednog dana od dana objavljivanja na Oglasnoj ploči i web stranici Općine Vogošća,

Broj: 03-36-585/26
Vogošća, 07.04.2026. godine

OPĆINSKI NAČELNIK

Migdad Hasanović

Obrazloženje

I Pravni osnov

Pravni osnov za donošenje ovog Pravilnika je:

- član 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", br.49/06 i 51/09) i član 71. Statuta Općine Vogošća – („Službene novine Kantona Sarajevo“, broj 27/14 – Prečišćeni tekst i 14/15, 9/20 i 23/24) kojim je određena nadležnost Općinskog načelnika za donošenje pojedinačnih i općih akata iz samoupravnog djelokruga općine.
- Član 13. Odluke o izvršavanju Budžeta Općine Vogošća za 2026. godinu ("Službene novine Kantona Sarajevo", broj 2/26) kojom se obezbjeđuju sredstva za podršku sportistima na odlazak na internacionalna takmičenja
- tačkom 5. Smjernica o minimalnim standardima dodjele proračunskih sredstava putem transfera i subvencija u Federaciji Bosne i Hercegovine („Službene novine Federacije BiH“ 37/24) definisana je obaveza primjena Smjernica od strane lokalnih zajednica.

II Razlozi donošenja

U cilju podrške uspješnim sportistima Općina Vogošća je planirala sredstva u Budžetu za 2026.godinu. Ovim Pravilnikom unapređuju se uslovi za neometan sportski angažman pojedincima i stvaraju se prilike za ostvarivanje boljih rezultata u sportu. Istovremeno donošenjem Smjernica o minimalnim standardima dodjele proračunskih sredstava putem transfera i subvencija u Federaciji Bosne i Hercegovine definisana je obaveza izrade pravnih akata za procese, odnosno za transfere i grantove koji se isplaćuju iz budžeta lokalnih zajednica. Zbog navedenog bilo je neophodno pristupiti izradi Pravilnika. Na ovaj način će proces dodjele sredstva biti transparentniji, raspoređivanje sredstva će biti objektivnije, a sam proces dodjele sredstava efikasniji.

III Obrazloženje predloženih rješenja

- Član 1. – definiše predmet Pravilnika;
- Član 2. – uređuje cilj i svrhu;
- Član 3. – propisuje rodno značenje;
- Član 4. – propisuje pravo na dodjelu;
- Član 5. – definiše postupak dodjele sredstava;
- Član 6. – propisuje potrebnu dokumentaciju;
- Član 7. – reguliše iznose sredstava;
- Član 8. – definiše proces izvještavanja i monitoringa;
- Član 9. – reguliše stupanje na snagu.

III Finansijska sredstva

Sredstva za sufinansiranje odlaska mladih sportista na internacionalna takmičenja sa područja općine Vogošća planirana su u Budžetu Općine Vogošća.